

نایب المصنف

حزب المصنف

(عجایب سبعة عالم)

اثار عتیقه دن عند المتقدمین اعظم مصنوعات بشریه عد اولنور یدی
شی واردرکه بونلره عجایب سبعة عالم تعبیر اولنور
برنجیسی زمان قدیمده بغداد حواله بسنده حله شهری جوارنده واقع
بابل یاخود بایلون شهرینک سور و باغچه سیدرکه سور مذکور ایکی یوز
الی قدم ارتفاعنده و الی قدم سمکنده و مربع الشكل اوله رق
هر ضلعی درت ساعت امتدادنده ایدی و جوانب اربعه سننده
جمله سی تونجیدن اولق اوزره یوز قیوسی اولوب اشبو قبولک ارالنده
و سورک کوشه لنده دیواردن اون قدم مرتفع ایکی یوز الی قله
وار ایدی سور مذکور غایت ایری طوغله ایله بنا اولنوب کرج
و خراسان یرینه زفت ایله صوانمش و اطرافنده غایت جسیم و متسع
صو طولو بر خندق اولوب اشبو خندقک حین حفرنده چیقان طو پراقلردن
سور مذکور بناسنده استعمال اولنان طوغله لر اعمال قلمشیدی
ذکر اولنان باغچه غایت جسیم کرلر اوزرینه انشا اولنوب سطحی
سورک

سورک ارتفاعه مساوی و زمینی شهره ناظر ایدی و هر درلو جسیم
 اغاج کوك صالوب کرکی کبی نشو و نما بوله جتی درجده درونه
 طوپراق طولدیرلمش ایدی
 شهر مذکوری میلاد عیسی دن ایکبیک الیوز قرق سنه مقدم نمرود
 بنا ایدوب بعده ییلوس نام ملک توسیع ایله بایلیون دولته پای تخت
 اتخاذ ایلدی اندنصرکه تشکل ایدن آسیری دولت جسیده سنه دخی
 مقر حکومت اولوب از زمان ظرفنده وسعت و معموریتجه درجه کماله
 واصل اولدیغندن شیخ المؤرخین عنوانیله شهرت شعار اولان یونانی
 هره دوط زمانه یعنی میلاددن بشیوز سنه اوله کلنجیه قدر بایلیون
 شهری اعظم مداین عالم عد اولنور ایدی فقط صکرملری تدنی
 و خرابیه یوز طوطوب میلاددن اوچپوز اوتوز سنه مقدم اسکندر
 رومی قبضه تصرفه کچرک صاحب خروج مشار الیه دخی مملکته
 پای تخت اولق اوزره انتخاب ایدوب اولکندن زیاده تنظیم و اعماری
 منوی ضمیری بولندیغی حاله در عقب وفاتی وقوعه مبنی مئروک
 و خراب اولشدر دولت عباسیه مک ابتدای ظهورینه قدر شهر مذکور
 غایت کوچک اولهرق پایدار اولوب فقط الان بالکلیه محو و خراب
 اولهرق بعض ابنیه سی اثارندن بشقه برشی قالماشدر
 ایکنجیسی مصرده واقع اهرامدر که عند العوام فرعون تپه لری دیتکله
 بنام ابنیه جسیده در بونلر مربع الشکل اولق اوزره قاعده سی یعنی اشاغی
 طرفی وسعتلو اولوب یوقاروسی بالتدریج کوچیله رک تپه سی بر نقطه
 ایله منتهی اولور و اشکال هندسیه دن هر می تعبیر اولنان شکل دخی
 بونلره منسوبدر اهرام مذکوره بعض ملوک مصریه یه و زمان قدیمه
 معبود اتخاذ اولنان بعض حیوانات مقدسیه مدفن اولق اوزره

بنا اولنوب زمیندن بر مقدار مرتفع کوچک قبولدن درونلرینه دخول
اولنور ابنه مذکوره نك الك مشهورلری قاهره پیشگاهنده جیره نام قریه
جوارنده واقع اولوب بونلرك دخی الك جسمی اولان هرمك قاعدهسی
ایکی یوز اون بش مترو اتساعنده و یوز اوتوز اوج مترو ارتفاعنده در
تاریخ بناری دخی عند المؤرخین مختلف فیه اولوب فقط میلاد عیسایان
یک بشوز و یاخود ایکی یک سنه مقدم اولسی ظن اولنور مصرک
دها یک چوق واقعنده بولندیغی مثللو ممالک سائرده دخی بو مقوله
اهرام موجود اولوب از جمله امریقاده واقع مکسیقا مملکتنده بولنان
بو مثللو ابنه نك اهرام مصریه یه زیاده مشابهنی واردر حتی بو کامینی
بعض مؤلفین ازمند قدیمده امریقا قطعدهسی قطعات سائر
سکندهسی عندنده مجهول اولوب قدماى مصرینک مکسیقا اهابسیله
مناسبتلری اولدیغنه ذاهب اولشدر ذکر اولنان اهرام مصریه غایت
جسیم طاشلرله بنا اولنش اولوب اشبو طاشلردخی نیلک صاغ طرفده
و اهرامک مقابلنده واقع طاشلردن قطع و نقل اولندیغی آثار دلالتیه
اکلاشلور اشبو اهرامک هیچ بر محنده افکاره دلالت ایدر خطوط
و نقوش کوریه مامش اولدیغندن بعض مؤرخین ابنه مذکوره نك
هنوز صنعت کاتب ایجاد اولنمقسزین بنا اولندیغنه ذاهب اولشدر
ایسده اصول هندسییه متوقف بو مثللو صنایع عجیبه نك مبدأ علوم
اولان صنعت کاتبندن بی بهره بر طائفه جاهله دن صدوری بعید
الاحتمالدر

اوجنچیسى قدماى یونانک معبودی اولان الهه نك رئیسى ژوپترک
تصویر مجسمیدر که تاریخ میلاددن تقریباً درتوز سنه مقدم فیدياس
نام مشهور مصور معرفتیه انشا و یونانستانده الید شهرنده واقع
اولمی

اولیجی عبادتخانه سنه وضع اولنشدی اشبو تصویر قبل دیشندن
مصنوع و سراپا التون و ذقیمت احجار ایله مزین و مرصع اولوب
جالسأ یاپلش اولدیغی حالدده ایکی یوزاون ایکی قدم ارتفاعنده ایدی
دردنجبسی اسکندریه فنارقله سیدرکه میلاددن ایکی یوز سکسان اوچ
سنه مقدم ملوک مصریه دن برتولومی زماننده اسکندریه پیشگاهنده
واقع فاروس نام جزیره ده بر مرتفع قبا اوزرنده انشا اولنمشیدی
و تپه سنده کیچک لری قنبدیل یا قبله رق مسافه بعیده دن ضیائی مشاهده
اولنوردی مذکور قله سراپا بیاض مر مر دن غایت مصنع اولوب
باخصوص خارجدن یاپلش اولان نردبانی شایان استغراب ایدی مربع
الشکل اولق اوزره هر ضلعی الی ارشون امتدادنده و دیواری اوچ
بچی ارشون سمکنده ایدی و دروننده بکچی اقامته مخصوص محلدن
بشق متعدد دایره اولوب کذرکاهلری دخی اوچ ارشون عرضنده ایدی
قبوسی زمیندن مرتفع و مقابلنده ینه او ارتفاعده بر بنا اولوب بوتک
اوزرندن قپوسه تمسید اولمش تخته زدن مرور ایله دروننه دخول
اولنور ایدی و حین حاجتده مذکور تخته قالدیرلقدده ایچرویه کیرلک
ممکن اوله مز ایدی مصارف واقعه سی شمذیکی زمان اچده سنه قیاسا اوچ
یوز ییک انکلیز لیراسنه بالغ اولشدر اشبو فنار لیل راهنمای سفائن اولق
اوزره احداث اولنان ابنیه تک برنجبسی اولوب اولوقت واقع اولدیغی
مذکور فاروس اطه سنه منسوباً اسمنه فاروس اطلاق اولندیغندن بعده
اوروپاده بو مقوله فنارلرک کافه سی بو اسم ایله تسمیه اولسوب حتی
ترکیده مستعمل اولان فنارلفظنک دخی بوندن نشأت ایتمش اولسی
ملاحظه دن بعید دکلدر

مذکور فناریک بشبوز سنه قدر پایدار اولدقدنصرکه هرور زمان ایله

هجرتك التي يوز الي سنه سنه طوغرى خراب اولمشدر اول اثنايه ملوك
مصريه دن ملك الناصر اشبو فنارك مقابلنده اكا مشابه ديكر بر فنار
بناسنه شروع ايلش ايسنده وفاتى حسبيله اتمامنه موفق اوله مامشدر
بشجيسى اياصولوقده واقع ديان عبادتخانه سيدر كه درت يوز سكسان
بش قدم طولنده و ايكي يوز يكرمى قدم عرضنده غايت جسيم بر بنا
ايدى دروننده التمش قدم ارتفاعنده يوز يكرمى يدى مرمر ديرك
موجود اولوب بونلردن اوتوز التبسى غايت نفيس اويملر ايله مزين
ايدى همان بتون آسيا اهابسى يوز يكرمى سنه بونك بناسنده
ايشلديرلشدر اروسزات اسمنده بر بوداله مجرد ابقاي نامنه وسيله اولق
غرض فاسديه ميلاددن اوج يوز الى الى سنه مقدم بالتصادف
اسكندر رومينك ولادتى كوني معبد مذكورى احراق الماشدر
التنجيسى ردوس هيكلى عظيميدر كه زمان قديمده معبود اتخاذ اولمش
اولان شمسه مخصوص بر تصوير اولوب ايكي يوز بش قدم ارتفاعنده
توئجدن مصنوع ايدى ردوس ليانته دخول اولنه جق محله اقامه
اولمش اولديغندن الك بيوك سفان يلكنلرى اچق اولديغى حالده
ايكي بجاغى ارمشندن مرور و عبور ايدرلر ايدى
اشبو تصويرك صاغ السنه كيچدلى كبلره ارائه طريق ايلمكه
مخصوص بر فنار وار ايدى و اياقلىرىك باش پرمقلىرى انسان انجق
قوجاقليله جلك درجدهه ييوك ايدى شارس نام يونانلو مصور
مشهور معرفيله ميلاددن اوج يوز سنه مقدم اشبو هيكلى عجيبك
اعمالنه مبادرت اولنوب يكرمى ايكي سنه ظرفنده اكمل قلمشدر الى
سكز سنه پايدار اولدقدن صكره يعنى ميلاددن ايكي يوز يكرمى سنه
مقدم بر حركت ارض سبيله دكر كنارينه دور يلوب ميلادك الى يوز
يتش

یتش سنده سنه قدر حالی اوزره برده قالمشیدی خلفای بنی امیه دن معاویه ردوس جزیره سنی فتح ایلدکده بریهودی بازارکانه فروخت ایدوب اودخی پاره لیدرک طقوز یوزدوه یوکی تونج قالدیرمش اولدیغی مسطور صحایف توارینخدر

یئنجیسی موسوله اسمبله شهر تشعار اولان قبردر که میلاددن اوچ یوز الی اوچ سنه مقدم کاری مملکتی قرالی اولان موسولوس وفات ایتدکده زوجہ سی ارتسمیا انک ایچون از میر جوارنده وساحل دریاده واقع بودرون شهرنده بنا ایشدر مشارالیه زوجنه اولان کال محبتندن ناشی اولوقتک عادتک اوزره جنازه سنی احراق ایتدیرهک کلنی بلع ایتمش و بو وجهله کند وجودنده بر قبر ذیروح تهیه سیله اکتفا ایتسوب ابقای نام غرضیله نیجه یوز سنه لر آفات روزکاردن امین بر مزار متین اولیق اوزره اشبو موسوله بنی بنا ایلدی فقط کال حزن و اسفندن ناشی اشبو بنای عظیمک ختامنی کوره میدرک انشاسنه شروع اولندقدن ایکی سنه صکره آتش افتراق ایله بنیان وجودی خراب اولمشدر مذکور مزارک نفیس مرمردن اوله رق شکل مستطیلده یوز اون بر قدم اتساعنده و یوز قرق قدم ارتفاعنده اولوب هر طرفی اوتوز الی نفیس مرمر دیرک و تصاویر متنوعه ایله مزین ایدی تپه سنده بر هرم ایله درت بارکیق قوشولی بر عریه رسمی انشا قلمشیدی الی الان اوروپالور بیننده اومقوله مکلف مقابره موسوله اطلاق اولنور حکمای یوناندن انا قاغوراس بنای مذکوری تماشایلدکده کلی مصارف ایله وجوده کلدیکندن کلیه اولیق اوزره « وای تقدراقچه طاشه تحویل اولمش » دیدیکی مشهوردر

اشبو عجایب سبعة یه سورچینک علاوه اولنماسی دخی عجایبدن کورنمش

اولغله بو عجبیه مک دخی تعریف و بیانی مناسب مقام عد اولمشدر
 سور مذکورک طولی بیک بشیوز میل اولوب ارتفاعی یکریمی بش و سمنکی
 یعنی قالینلغی یکریمی قدمدر اوستی خیلی منسج بر جاده اولوب اوزرنده
 الی سوار یان یانه کیده ییلور اساسدن الی قدم ارتفاعنه قدر
 چارکوشه یوتمه یوک طاشدن اولوب یوقاری سنک بعض محلاری طوغله
 و بعضلری کریج ایله بنا اولمشدر اشبو سوری چینه جار ملاصق
 اولان مغول و منجوق طائفه لرینک هجوم و تجاوزلرندن احترازاً
 تسین خاندانندن تسین سی هواغ تی نام خاقان میلاددن ایکی یوز قرق
 یدی سنه مقدم بنا ایلش ایسده مقصد مذکور حصوله مدار
 اوله مبوب مؤخرأ طوائف مذکوره ممالک چینه اسبلا ایدرک زمام
 حکومت دخی اللرینه یکممش و بو صورتله برلشدرک جمله سی بر دولت
 جسمه تشکیل ایلشدر

سور مذکورک بناسنده درت بش میلیون ادم اون سنه متوالیا
 ایشلتدیریلوب بولردن درت یوز یکی بو یولده تلف اولشدر
 سراپا اوزرنده قله لر اولوب هر طرفنده دشمنه مدافعه اولنه بیلک
 ایچون اشبو قله رک ارالی ایکی اوق منزلیدر و سهولتله تجاوز ملخوط
 اولان محلارنده یکدیگری محافظه ایتک ایچون ایکی اوچ قات سور بنا
 اولمشدر هرور ایتدیکی خط اوزرنده کترله واقع غایت یوکسک
 طاغلردن و دره لردن دخی سباق واحد اوزره امرار اولمش و اشبو
 طاغلردن بریسی بش بیک ایکی یوز یکریمی بش قدم ارتفاعنده
 بولمشدر بعض ارباب تحقیقک حسابنه کوره اشبو سورک اعمانه صرف
 اولنان موادکره ارضی ایکی کره احاطه ایتک اوزره الی قدم ارتفاعنده
 و ایکی قدم قالینلغنده بر دیوار بناسنه کافی اولور درت جسمه تیمور
 قبودن

قبودن بشقه اقتضای موقعه سده کوره هر طرفه دیگر کوچک قبولی
اولوب مخصوص مستحفظی واردر روایت اولندیغه کوره تاتارلر چین
دخول ایدرک زمام حکومتی دست تصرفلرینه المزدن اول اصل چینلی
بولنان ایمپراطورلر اشبو سورک محافظه سنده برملبون قدر آدم استخدام
ایدوب بر منوال محرر البوم تاتارستانک جرؤ اعظمی چین ایله برلشدرک
جمله سی هیئت واحده تشکیل ایلدکلری جهتله تاتارستان طرفک
محافظه سده حاجت قالدیغندن مواقع سائر سنده ایجاب ایدن بعض
مخلارده عسکر اقامه سیله اکتفا اولنور

البوم لزوم واهمیتی قالماش اولان سور مذکورک انشاسی محافظه
حدود مقصدندن بشقه بولتیغه جه بعض اغراضه مبنی اولوب
شویله که اشبو اثر جسمیه موفق اولان ایمپراطورک بعض اسلافی زماننده
ممالک چین بینده تفرقه دوشدرک بر طاقم کوچک حکومتلره منقسم
اولدیغی حالده ایمپراطور مشار البه قوه قاهره سیله جمله سنی دائرة
اطاعتیه امخال و بو وجهله چینی هیئت سابقه سده ارجاع ایلدکدن
صکره طوائف مغلوبه یه مدار مشغولیت اوله رق اجرای فتن
و فساد میدان بوله ماملری ضمننده بونلردن بشوز بیک نفرینی قلعه زده
توقیف ایله امور نافعه یه چالشدیردیغی مثللو بقیه سیله سائر اهالی
ذکورک برثلثی اشبو سور عظیمک بناسنده استخدام ایلشدر

سور مذکورک بناسنده فوق الغایه اهتمام و اعتنا اولندیغی جهتله
البوم ایکی بیک ایکوز سده مرور ایلدیکی حالده بر وجهله خلل پذیر
اولدیغی مثللو دهها نیجه بیک سده پایدار اوله ییله جکی درکاردر
ذکر اولنان اثار قدیمه دهها پک چوق امثاللری کبی محیر عقول صنایع
غریبه و تشبثات عظیمه یی شامل اوله رق نوع انسانک نه درجه امور

جسمیده مقتدر اولدیغنی اراه ایلدیکی مثللو متقدمینک کرک صنعت
و کرک اقدام و همت جهنیه فضل و کمالرینه دال ایسده بر لحظه
ظاهر ینسلاک ترک اولنهرق مسئله نك منشأ و حقیقتی ملاحظه
اولندیغنی حالده بعض مقاصد واهیة ضمنده بو قدر تکلفات اختیاری
ناروا کور یله جکی شویله طورسون جباره ملوک و دیعة الله اولان
رعایای کندو هوا و هوسلری مقتضاتنک اجرا سیچون خلق اولنمش برآت
عمیا عدیله اثار مذکوره بناسنده مجاناً استعمال ایتش اوله جقلری
اکلاشیه جغندن اثار مذکوره امرای اسلافه نسبتله سزاوار ستایش
و ثنا اولدقدن بشقه نهایت ظلم و تعدیلرینه دلیل اولدیغنی مثللو فقرای
اهالینک حال اسارت اشتعالری جای تأسفدر یوخسه ملیونلره عمله نیجه
سندلر اجرت مناسبه اعطا اولنهرق حسن رضایله استخدام اولنسنه هیچ
نر مملکت خزنده سی متحمل اوله میوب اهرام مصریه بناسنده قوللانیلان
عمله یه بر قوت لایمیت اولوق اوزره یومی یالکز بر اتمک ایله صوغان
و سور چینده ایشلدیریلان اشخاصه دخی بر مقدار پرنج ویرلدیکی
منقولدر خلاصه کلام اثار عتیقه مذکوره قدماتک عظم شان و قدرته
علامت اولدیغنی مثللو کال ظلم و تعدیلرینه دخی دلالت ایله جکی
مسلم ارباب دقتدر بر مملکتک حقیقه شرف و شانی موجب اوله جق
اثار خیریه افراد اهالی یه مستلزم بار و کلفت اولیه رق فائده سی مساوات
اوزره عمومه راجع اولان شیر اولوب یوخسه اثار قدماتک جمله سنده
مشهود اولدیغنی وجهله چاموری اشک چشم ضعیفا ایله یوغریلان
مبائی مشیده دن بایسنه نه تفاخر واردر صورتده موجب شان و معناده
محض شبندر (پادشاهی که طرح ظلم افکند پای دیوار قصر خویش بکند)